

Qwè po nosse walon ?

Quand vos moussîz à li p'tite sicole aviè l'adje di cénq ans, aprinde qui tot l' monde ni cause ni come vosse man, c'è-st-one fèle cwachûre.

Pus taurd, quand on vos aprind à scrîre dès bias mots è francès, quand on vos oblidge à n' pus causer l' lingadje di vosse man, ça n' fait qui r'tourner l' coutia dins l' plâye.

Co pus taurd, quand on vos-aprind qui l' lingadje di vosse man provént dèl latén qu'on vos done à spèpyi, po qu' vosse tièsse fuche bèn faîte ; ça n' fait qui r'drovu l' plâye.

Avou lès-ans qui cour'nut, avou lès djins d'autou d' nos qui n' sav'nut pus, avou nos-éfants qui n' sâront pus...

Dji n'a pus qu' mès-ouys po braîre...

Au pus lon èri qu'on-z-èst d' sès racines, au pus fwârt qui l' loyén s'adeûrit.

Qu'a-dj' sayi po pwârter à s'minces ?

Ènn'a-t-i, qui come mi, vourîn' co bouter po chaper leû lingadje ? Wêre, byin wêre ! Dji n' vwè pus qui dès djins què l' wîy'nut come on mwârt. I-gn-a pus qu' dès spèpieûs qui nè l' sav'nut pus causer qu' po vos d'ner dès lèçons. Èt, s'i-gn-a onk qui sâye one saqwè, on s' daure dissus, sins l' chouter, à l' place di li d'ner on còp d'mwin po ténre li mitan dèl vòye...

I n' mi d'mère pus qu' mès-ouys po braîre...

À qwè ç' qu'i siève co, quand on n'a pus qu' sès-ouys po l' braîre ?

Mauj'ni
Jacques Desmet